

सिरि उसहदेवसामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइमहावीरवद्धमाणसामिस्स । सिरि गोयम - सोहम्माइ सव्व गणहराणं णमो । सिरि सुगुरु - देवाणं णमो । **श्रीबृहत्कल्पसूत्रम्- श्री** पीठिकाभाष्यगाथा: '८०८' नो कप्पइ निग्गन्थाण वा निग्गन्थीण वा आमे तालपलम्बे अभिन्ने पडिग्गाहेत्तए '१००२'।१। कप्पइ निग्गन्थाण वा निग्गन्थीण वा आमे तालपलम्बे भिन्ने पडिग्गाहेत्तए '१०३६'।२। कप्पइ निग्गन्थाणं पक्के तालपलम्बे भिन्ने वा अभिन्ने वा पडिग्गाहेत्तए ।३। नो कप्पइ निग्गन्थीणं पक्के तालपलम्बे अभिन्ने पडिग्गाहेत्तए ।४। कप्पइ निग्गन्थीणं पक्के तालपलम्बे भिन्ने पडिग्गाहेत्तए, सेऽवि य विहिभिन्ने, नो चेव णं अविहिभिन्ने (पलम्बपगरणं '१०८९') ।५। से गामंसि वा नगरंसि वा खेडंसि वा कब्बडंसि वा पट्टणंसि वा मडम्बंसि वा आगरंसि वा दोणमुंहसि वा निगमंसि वा रायहाणिंसी वा आसमंसि वा संनिवेसंसि वा संवाहंसि वा घोसंसि वा अंसियंसि वा पुडभेयणंसि वा सपरिक्खेवंसि अबाहिरियंसि कप्पइ निग्गन्थाणं हेमन्तगिम्हासु एगं मासं वत्थए ।६। से गामंसि वा जाव रायहाणिंसि वा सपरिक्खेवंसि सबाहिरियंसि कप्पइ निग्गन्थाणं हेमन्तगिम्हासु दो मासे वत्थए, अन्तो एगं मासं बाहिं एगं मासं, अन्तो वसमाणाणं अन्तो भिक्खायरिया बाहिं वसमाणीणं बाहिं भिक्खायरिया ।७। से गामंसि वा जाव रायहाणिंसि वा सपरिक्खेवंसि अबाहिरियंसि कप्पइ निग्गन्थीणं हेमन्तगिम्हासु दो मासे वत्थए ।८। से गामंसि वा जाव रायहाणिंसि वा सपरिक्खेवंसि सबाहिरियंसि कप्पइ निग्गन्थीणं हेमन्तगिम्हासु चत्तारि मासे वत्थए, अंतो दो मासे बाहिं दो मासे, अंतो वसमाणीणं अंतो भिक्खायरिया बाहिं वसमाणीणां बाहिं भिक्खायरिया, '२१-३०'।९।० से गामंसि वा जाव रायहाणिंसि वा एगवगडाए एगदुवाराए, गनिक्खमणपवेसाए नो कप्पइ निग्गन्थाण य निग्गन्थीण य एगयओ वत्थए ।१०। से गामंसि वा जाव रायहाणिंसि वा अभिनिव्वगडाए अभिनिदुवाराए अभि (णेग) निक्खमणपवेसाए कप्पइ निग्गन्थीण य एगयओ वत्थए '२३००'।११। नो कप्पइ निग्गन्थीणं आवणगिहंसि वा रत्थामुहंसि वा सिङ्घाडगंसि वा तियंसि वा चउक्कंसि वा चच्चरंसि वा अंतरावणंसि वा वत्थए ।१२। कप्पइ निग्गन्थाणं आवणगिहंसि वा जाव अंतरावणंसि वा वत्थए '२३३०'।१३। नो कप्पइ निग्गन्थीणं अवङ्गुयदुवारिए उवस्सए वत्थए, एगं पत्थारं अंतो किच्चा एगं पत्थारं बाहिं किच्चा ओहाडियचिलिमिलियागंसि एवणं कप्पइ वत्थए '२३५७'।१४। कप्पइ निग्गन्थाणं अवङ्गुयदुवारिए उवस्सए वत्थए '२३६६'।१५। कप्पइ निग्गन्थीणं अंतोलित्तयं घडिमत्तयं धारेत्तए वा परिहरित्तए वा '२३६९'।१६। नो कप्पइ निग्गन्थाणं अंतोलित्तयं घडिमत्तयं धारेत्तए वा परिहरित्तए वा '२३७५'।१७। कप्पइ निग्गन्थाणं वा निग्गन्थीण वा चेलचिलिमिलियं धारेत्तए वा परिहरित्तए वा '२३८७'।१८। नो कप्पइ निग्गन्थाण वा निग्गन्थीण वा दगतीरंसि चिट्ठित्तए वा निसीइत्तए वा तुयट्ठित्तए वा निद्दाइत्तए वा पयलाइत्तए वा असणं वा० आहारमाहारेत्तए वा उच्चारं वा पासवणं वा खेलं वा सिंघाणं वा परिट्ठवेत्तए, सज्झायं वा करेत्तए, धम्मजागरियं वा जागरित्तए, झाणं वा झाइत्तए, काउस्सगं वा करित्तए, ठाणं वा ठाइत्तए '२४३०'।१९। नो कप्पइ निग्गन्थाण वा निग्गन्थीण वा सचित्तकम्मे उवस्सए वत्थए ।२०। कप्पइ निग्गन्थाण वा निग्गन्थीण वा अचित्तकम्मे उवस्सए वत्थए '२४३८'।२१। नो कप्पइ निग्गन्थीणं सागारियं अनिस्साए वत्थए ।२२। कप्पइ निग्गन्थीणं सागारियनिस्साए वत्थए '२४५०'।२३। कप्पइ निग्गन्थाणं सागारियनिस्साए वा अनिस्साए वा वत्थए '२४५३'।२४। नो कप्पइ निग्गन्थाण वा निग्गन्थीण वा सागारिए उवस्सए वत्थए, कप्पइ निग्गन्थाण वा निग्गन्थीण वा अप्पसागारिए उवस्सए वत्थए '२५५५'।२५। नो कप्पइ निग्गन्थाणं इत्थिसागारिए उवस्सए वत्थए ।२६। कप्पइ निग्गन्थाणं पुरिससागारिए उवस्सए वत्थए ।२७। नो कप्पइ निग्गन्थीणं पुरिससागारिए उवस्सए वत्थए ।२८। कप्पइ निग्गन्थीणं इत्थिसागारिए उवस्सए वत्थए '२५८७'।२९। नो कप्पइ निग्गन्थाणं पडिबद्धाए सेज्जाए वत्थए ।३०। कप्पइ निग्गन्थीणं पडिबद्धाए सेज्जाए वत्थए '२६३३'।३१। नो कप्पइ निग्गन्थाणं गाहावइकुलस्स मज्झंमज्झेणं गुंतुं वत्थए ।३२। कप्पइ निग्गन्थीणं गाहावइकुलस्स मज्झंमज्झेणं गुंतुं वत्थए '२६८०'।३३। भिक्खू य अहिगरणं कट्टु तं अहिगरणं

सौजन्य :- अं. सौ. कल्पना केतन टोकरशी सावला - जिनल - धवल इरछ (लीसरावाण)

अविओसवेत्ता अविओसवियपाहुडे इच्छाए परो आढाएज्जा इच्छाए परो णो आढाएज्जा इच्छाए परो णो आढाएज्जा इच्छाए परो अब्भुट्टेज्जा इच्छाए परो नो अब्भुट्टेज्जा इच्छाए परो वंदेज्जा इच्छाए परो नो वंदेज्जा इच्छाए परो संभुअेज्जा इच्छाए नो संभुअेज्जा इच्छाए परो संवसेज्जा इच्छाए परो नो संवसेज्जा इच्छाए परो उवसमेज्जा इच्छाए परो नो उवसमेज्जा, जो उवसमइ तस्स अत्थि आराहणा जो न उवसमइ तस्स नत्थि आराहणा, तम्हा अप्पणा चैव उवसमियव्वं. से किमाहु भंते ? उवसमसारं खु सामणं '२७३८'।३४। नो कप्पइ निग्गंथाण वा निग्गंथीण वा वासावासासु चारए ।३५। कप्पइ निग्गंथाण वा निग्गंथीण वा हेमंतगिम्हासु चारए '२७६३'।३६। नो कप्पइ निग्गंथाण वा निग्गंथीण वा वेरज्जविरूद्धरज्जंसि सज्जं गमणं सज्जं आगमणं सज्जं गमणागमणं करेतए, जे खलु निग्गंथे वा निग्गंथी वा वेरज्जविरूद्धरज्जंसि सज्जं गमणं आगमणं सज्जं गमणागमणं करेइ करेतं वा साइज्जइ से दुहओ वीइक्कममाणे आवज्जइ चाउम्मासियं परिहारट्ठाणं अणुग्याइयं '२७९५'।३७। निग्गंथं च णं गाहावइकुलं पिंडवायपडियाए अणुप्पविट्ठं केई वत्थेण वा पडिग्गहेण वा कम्बलेण वा पायपुच्छणेण वा उवनिमंतेज्जा कप्पइ से सागारकडं गहाय आयरियपायमूले ठवेत्ता दोच्चंपि उग्गहं अणुत्तवेत्ता परिहारं परिहरित्तए '२८१८'।३८। निग्गंथं च णं बहिया वियारभूमिं वा विहारभूमिं वा निक्खंतं समाणं केइ वत्थेण वा पडिग्गहेण वा कम्बलेण वा पायपुच्छणेण वा उवनिमंतेज्जा कप्पइ से सागारकडं '२८१९'।३९। निग्गंथिं च णं गाहावइकुलं पिंडवायपडियाए अणुप्पविट्ठंतं चैव णवरं पवत्तिणीपायमूले ठवेत्ता०।४०। निग्गंथिं च णं बहिया विहारभूमिं वा वियारभूमिं वा जाव परिहारं परिहरित्तए '२८४०'।४१। नो कप्पइ निग्गंथाण वा निग्गंथीण वा राओ वा वियाले वा असणं वा० पडिग्गाहेत्तए ।४२। नत्तथ एगेणं पुव्वपडिलेहिएणं सेज्जासंथारएणं '२८७३'।४३। नो कप्पइ निग्गंथाण वा निग्गंथीण वा राओ वा वियाले वा वत्थं वा पडिग्गहं वा कम्बलं वा पायपुच्छणं वा पडिग्गाहेत्तए '३००५'।४४। नत्तथ एगाए हरियाहडियाए, सावि य परिभुत्ता वा धोया वा रत्ता वा घट्टा वा मट्टा वा संपधूमिया वा '३०४२' ।४५। नो कप्पइ निग्गन्थाण वा निग्गन्थीण वा राओ वा वियाले वा अद्धाणगमणं एत्तए '३१४२' ।४६।० संखडिं वा संखडिपडियाए अद्धाणगमणं एत्तए '३२१०'।४७। नो कप्पइ निग्गन्थस्स एगाणियस्स राओ वा वियाले वा बहिया विहारभूमिं वा वियारभूमिं वा निक्खमित्तए वा पविसित्तए वा, कप्पइ से अप्पबिइयस्स वा अप्पतइयस्स वा राओ वा वियाले वा बहिया विहारभूमिं वा वियारभूमिं वा निक्खमित्तए वा पविसित्तए वा '३२२५' ।४८। नो कप्पइ निग्गन्थीए एगाणियाए राओ वा वियाले वा बहिया वियारभूमिं वा विहारभूमिं वा निक्खमित्तए वा पविसित्तए वा, कप्पइ से अप्पतइयाए वा अप्पचउत्थीए वा राओ वा वियाले वा बहिया वियारभूमिं वा विहारभूमिं वा निक्खमित्तए वा पविसित्तए वा '३२४३'।४९। पुरत्थिमेणं कप्पइ निग्गन्थाण वा निग्गन्थीण वा जाव अङ्गमगहाओ एत्तए दक्खिणेणं० जाव कोसम्बीओ एत्तए पच्चत्थिमेणं० जाव थुणाविसयाओ एत्तए उत्तरेणं जाव कुणालाविसयाओ एत्तए, एयावयाव कप्पइ, एयावयाव आरिए खेत्ते, नो से कप्पइ एत्तो बाहिं, तेण परं जत्थ नाणदंसणचरित्ताइं उस्सप्पन्तित्तिबेमि '३२९३'। ☆☆☆ ५०॥ पढमो उद्देसओ १॥ ☆☆☆ उवस्सयस्स अन्तो वगडाए सालीणि वा वीहीणि वा मुग्गाणि वा मासाणि वा तिलाणि वा कुलत्थाणि वा गोधूमाणि वा जवाणि वा जवजवाणि वा ओकिण्णाणि वा विक्खिण्णाणि वा विकिण्णाणि वा विप्पइण्णाणि वा नो कप्पइ निग्गन्थाण वा निग्गन्थीण वा अहालन्दमवि वत्थए '२०'।१। अह पुण एवं जाणेज्जा-नो ओकिण्णाणि नो विक्खिण्णाणं नो विकिण्णाणि नो विप्पइण्णाणं रासिकडाणि वा भित्तिकडाणि वा पुंजकडाणि वा कुलियकडाणि वा लञ्छियाणि वा मुहियाणि वा पिहियाणि वा कप्पइ निग्गन्थाण वा निग्गन्थीण वा हेमन्तगिम्हासु वत्थए '१०३'।२। अह पुण एवं जाणेज्जा-नो रासिकडाणं नो पुअकडाणं नो भित्तिकडाणं नो कुलियकडाणं कोट्टाउत्ताणि वा पल्लाउत्ताणि वा मञ्चाउत्ताणि वा मालाउत्ताणि वा ओलित्ताणि वा विलित्ताणि वा लञ्छियाणि वा मुहियाणि वा पिहियारि वा कप्पइ निग्गन्थाण वा निग्गन्थीण वा वासावासं वत्थए '१८६'।३। उवस्सयस्स अन्तो वगडाए सुरावियडकुम्भे वा सोवीरयवियडकुम्भे वा उवनिक्खित्ते सिया नो कप्पइ निग्गन्थाण वा निग्गन्थीण वा अहालन्दमवि वत्थए, हुत्था य उवस्सयं पडिलेहमाणे नो लभेज्जा एवं से कप्पइ एगरायं वा दुरायं वा वित्थए, नो से

कप्पइ एगरायाओ वा दुरायाओ वा परं वत्थए, जे तत्थ एगरायाओ वा दुरायाओ वा परं वसेज्जा से सन्तरा छेए वा परिहारे वा ।४। उवस्सयस्स अन्तो वगडाए सीओदगवियडकुम्भे वा उसिणोदगवियडकुम्भे वा उवनिक्खित्ते सिया नो कप्पइ निग्गन्थाण वा निग्गन्थीण वा अहालन्दमवि वत्थए, हुरत्था य उवस्सयं पडिलेहमाणे नो लभेज्जा एवं से कप्पइ एगरायं वा दुरायं वा वत्थए, नो से कप्पइ एगरायाओ वा दुरायाओ वा परं वत्थए, जे तत्थ एगरायाओ वा दुरायाओ वा परं वसेज्जा से सन्तरा छेए वा परिहारे वा '२२१'।५। उवस्सएस्स अन्तो वगडाए सव्वराइए जोई झियाएज्जा नो कप्पइ निग्गन्थाण वा निग्गन्थीण वा अहालन्दमवि वत्थए, हुरत्था य उवस्सयं पडिलेहमाणे नो लभेज्जा एवं से कप्पइ एगरायं वा दुरायं वा वत्थए, नो से कप्पइ एगरायाओ वा दुरायाओ वा परं वत्थए, जे तत्थ एगरायाओ वा दुरायाओ वा परं वसेज्जा से सन्तरा छेए वा परिहारे वा '२५०'।६। उवस्सयस्स अंतो वगडाए सव्वराइए पईवि दिप्पेज्जा नो कप्पइ निग्गन्थाण वा निग्गन्थीण वा अहालन्दमवि वत्थए, हुरत्था य उवस्सयं पडिलेहमाणे नो लभेज्जा एवं से कप्पइ एगरायं वा दुरायं वा वत्थए, नो से कप्पइ एगरायाओ वा दुरायाओ वा परं वत्थए, जे तत्थ एगरायाओ वा दुरायाओ वा परं वसेज्जा से सन्तरा छेए वा परिहारे वा '२६३'।७। उवस्सयस्स अंतो वगडाए पिण्डए वा लोयए वा खीरं वा दहिं वा सप्पिं वा नवणीए वा तेल्ले वा फाणियं वा पूवे वा सक्कुली वा सिहिरिणी वा ओकिण्णाणि वा विकिण्णाणि वा विइण्णाणि वा विप्पइण्णाणि वा नो कप्पइ निग्गन्थाण वा निग्गन्थीण वा अहालन्दमवि वत्थए '२६९'।८। अह पुण एवं जाणेज्जा नो ओकिण्णाइं० रासिकडाणि वा पुअकडाणि वा भित्तिकडाणि वा कुलियकडाणि वा लञ्छिवणि सर मुद्दियाणि वा पिहियाणि वा वा कप्पइ निग्गन्थाण वा निग्गन्थीण वा हेमंतगिम्हासु वत्थए '२७२'।९। अह पुण एवं जाणेज्जा-नो रासिकडाइं जाव नो भित्तिकडाइं कोट्टाउत्ताणि वा पल्लाउत्ताणि वा मञ्चाउत्ताणि वा मालउत्ताणि वा कुम्भित्ताणि वा करभित्ताणि वा ओलित्ताणि वा विलित्ताणि वा पिहियाणि वा लञ्छियाणि वा मुद्दियाणि वा कप्पइ निग्गन्थाण वा निग्गन्थीण वा वासावासं वत्थए '२७४'।१०। नो कप्पइ निग्गन्थाणं अहे आगमणगिहंसि वा वियडगिहंसि वा वंसीमूलंसि वा रुक्खमूलंसि वा अब्भावगासियंसि वा वत्थए '३००'।११। कप्पइ निग्गन्थाणं अहे आगमणगिहंसि वा वियडगिहंसि वा वंसीमूलंसि वा रुक्खमूलंसि वा अब्भावगासियंसि वा वत्थए '३०८'।१२। एगे सागारिए पारिहारिए दो तिण्णि चत्तारि पञ्च सागारिया पारिहारिया एगं तत्थ कप्पागं ठवइत्ता अवसेसे निव्विसेज्जा '३७५'।१३। नो कप्पइ निग्गन्थाण वा निग्गन्थीण वा सागारियपिण्डं बहिया अनीहडं असंसट्ठं संसट्ठं वा पडिग्गाहोत्तए '३८६'।१४-१५। नो कप्पइ निग्गन्थाण वा निग्गन्थीण वा सागारियपिण्डं बहिया नीहडं असंसट्ठं पडिग्गाहेत्तए ।१६। कप्पइ निग्गन्थाण वा निग्गन्थीण वा सागारियपिण्डं बहिया नीहडं संसट्ठं पडिग्गाहेत्तए ।१७। नो कप्पइ निग्गन्ताण वा निग्गन्थीण वा सागारियपिण्डं बहिया नीहडं असंसट्ठं संसट्ठं करेत्तए, जो खलु निग्गन्थो वा निग्गन्थी वा सागारियपिण्डं बहिया नीहडं असंसट्ठं संसट्ठं करेइ करेन्तं वा साइज्जइ से दुहओ वीइक्कममाणे आवज्जइ चाउम्मासियं परिहारट्ठाणं अणुग्घाइयं '४०१'।१८। सागारियस्स आहडिया सागारिएणं पडिग्गहिता तम्हा दावए नो से कप्पइ पडिग्गाहेत्तए ।१९। सागारियस्स आहडिया सागारिएणं अपडिग्गहिता तम्हा दावए एवं से कप्पइ पडिग्गाहेत्तए '४२०'।२०। सागारियस्स नीहडिया परेण अपडिग्गहिता तम्हा दावए नो से कप्पइ पडिग्गाहेत्तए ।२१। सागारियस्स नीहडिया परेण पडिग्गहिता तम्हा दावए एवं से कप्पइ पडिग्गाहेत्तए '४२८'।२२। सागारियस्स अंसियाओ अविभत्ताओ अव्वोच्छिन्नाओ अव्वोगडाओ अनिज्जूढाओ तम्हा दावए नो से कप्पइ पडिग्गाहेत्तए ।२३। सागारियस्स अंसियाओ विभत्ताओ वोच्छिन्नाओ वोगडाओ निज्जूढाओ तम्हा दावए एवं से कप्पइ पडिग्गाहेत्तए '४३८'।२४। सागारियस्स पूयाभत्ते उद्देसिए चेइए पाहुडियाए सागारियस्स उवगरणजाए निट्ठिए निसट्ठे पाडिहारिए तं सागारिओ देइ सागारियस्स परिजणो देइ तम्हा दावए नो से कप्पइ पडिग्गाहेत्तए '४४३'।२५। सागारियस्स पूयाभत्ते उद्देसिए चेइए पाहुडियाए सागारियस्स उवगरणजाए निट्ठिए निसट्ठे अपडिहारिए तं सागारिओ देइ नो सागारियस्स परिजणो देइ सागारियस्स पूया देइ तम्हा दावए नो से कप्पइ० ।२६। सागारियस्स पूयाभत्ते उद्देसिए चेइए पाहुडियाए सागारियस्स उवगरणजाए निट्ठिए निसट्ठे अपडिहारिए तं सागारिओ देइ

सागारियस्स परिजणो वा देइ तम्हा दावए नो से कप्पइ पडिग्गाहेत्तए ।२७। सागारियस्स पूयाभत्ते जाव अपडिहारिए तं नो सागारिओ देइ नो सागारियस्स परिजणो देइ सागारियस्स पूया देइ तम्हा दावए एवं से कप्पइ पडिग्गाहेत्तए '४४४'।२८। कप्पइ निग्गन्थाण वा निग्गन्थीण वा इमाइं पञ्च वत्थाइं धारेत्तए वा परिहरित्तए वा, तं जङ्गिए भङ्गिए साणए पोत्तए तिरीडप्यटे नामं पञ्चमे '४५८'।२९। कप्पइ निग्गन्थाण वा निग्गन्थीण वा इमाइं पञ्च रयहरणाइं धारेत्तए वा परिहरित्तए वा, तंजहा-ओण्णिए उट्टिए साणए बद्धाचि (विप्पावि) प्पए मुञ्चचिप्पिएवि नाम पञ्चमेत्तिबेमि '४६४'।☆☆☆ ३०॥ बिइओ उद्देसओ २॥ ☆☆☆ नो कप्पइ निग्गन्थाणं निग्गन्थीणं उवस्सयंसि आसइत्तए वा चिट्ठित्तए वा निसीइत्तए वा तुयट्ठित्तए वा निद्दाइत्तए वा पयलाइत्तए वा असणं वा० आहारं आहारेत्तए उच्चारं वा पासवणं वा खेलं वा सिङ्गाणं वा परिट्ठवेत्तए सज्झायं वा करेत्तए झाणं वा झाइत्तए काउस्सग्गं वा करेत्तए ठाणं वा ठाइत्तए '१२३'।१। नो कप्पइ निग्गन्थीणं निग्गन्थाणं उवस्सयंसि आसइत्तए जाव ठाणं ठाइत्तए '१२६'।२। नो कप्पइ निग्गन्थीणं सलोमाइं चम्माइं अहिट्ठित्तए '१४०'।३। कप्पइ निग्गन्थाणं सलोमाइं चम्माइं अहिट्ठित्तए, सेवि य परिभूते नो चेव णं अपरिभूते, सेवि य पाडिहारिए नो चेव णं अपडिहारिए, सेवि य एगराइए नो चेव णं अणेगराइए '१६४'।४। नो कप्पइ निग्गन्थाण वा निग्गन्थीण वा कसिणाइं चम्माइं धारेत्तए वा परिहरित्तए वा '१९१'।५। कप्पइ निग्गन्थाण वा निग्गन्थीण वा अकसिणाइं चम्माइं धारेत्तए वा परिहरित्तए वा '१९८'।६। नो कप्पइ निग्गन्थाण वा निग्गन्थीण वा कसिणाइं वत्थाइं धारेत्तए वा परिहरित्तए वा, कप्पइ निग्गन्थाण वा निग्गन्थीण वा अकसिणाइं वत्थाइं धारेत्तए वा परिहरित्तए वा '२३७'।७। नो कप्पइ निग्गन्थाण वा निग्गन्थीण वा अभिन्नाइं वत्थाइं धारेत्तए वा परिहरित्तए वा कप्पइ निग्गन्थाण वा निग्गन्थीण वा भिन्नाइं वत्थाइं धारेत्तए वा परिहरित्तए वा '४१७'।८। नो कप्पइ निग्गन्थाणं उग्गहणन्तगं वा उग्गहपट्ठगं वा धारेत्तए वा परिहरित्तए वा '४२२'।९। कप्पइ निग्गन्थीणं उग्गहणन्तगं वा ओगाहणपट्ठगं वा धारेत्तए वा परिहरित्तए वा '४६५'।१०। निग्गन्थीए य गाहावइकुलं पिण्डवायपडियाए अणुप्पविट्ठाए चेलट्ठे समुप्पज्जेज्जा नो से कप्पइ अप्पणो निस्साए चेलाइं पडिग्गाहेत्तए, कप्पइ से पवत्तिणीनिस्साए चेलाइं पडिग्गाहेत्तए, नो य से तत्थ पवत्तिणी समाणी सिया जे तत्थ समाणे आयरिए वा उवज्झाए वा पवत्ती वा थेरे वा गणी वा गणहरे वा गणावच्छेइए वा जं च णं पुरओ कट्टु विहरति कप्पइ से तन्नीसाए चेलाइं पडिग्गाहेत्तए '५०५'।११। निग्गन्थस्स तप्पढमयाए संपव्वयमाणस्स कप्पइ रयहरणगोच्छगपडिग्गहमायाए तिहि य कसिणेहिं वत्थेहिं आयाए संपव्वइत्तए, से य पुव्वोवट्ठिए, से य पुव्वोवट्ठिए सिया एवं से नो कप्पइ रयहरणपडिग्गहगोच्छगमायाए तिहि य कसिणेहिं वत्थेहिं आयाए संपव्वइत्तए. कप्पइ से अहापरिग्गहियाइं वत्थाइं गहाय आयाए संपव्वइत्तए '५५०'।१२। निग्गन्थीए णं तप्पढमयाए संपव्वयमाणीए कप्पइ से रयहरणगोच्छगपडिग्गहमायाए चउहिं कसिणेहिं वत्थेहिं आयाए संपव्वइत्तए, सा य पुव्वोवट्ठिया सिया एवं से नो कप्पइ रयहरणगोच्छगपडिग्गहमायाए चउहिं कसिणेहिं वत्थेहिं आयाए संपव्वइत्तए, कप्पइ से अहापरिग्गहियाइं वत्थाइं गहाय आयाए संपव्वइत्तए '५५२'।१३। नो कप्पइ निग्गन्थाण वा निग्गन्थीण वा पढमसमोसरणुद्देसपत्ताइं चेलाइं पडिग्गाहेत्तए, कप्पइ निग्गन्थाण वा निग्गन्थीण वा दोच्चसमोसरणुद्देसपत्ताइं चेलाइं पडिग्गाहेत्तए '६२४'।१४। कप्पइ निग्गन्थाण वा निग्गन्थीण वा अहाराइणियाए चेलाइ पडिग्गाहेत्तए '६८३'।१५। कप्पइ निग्गन्थाण वा निग्गन्थीण वा अहाराइणियाए सेज्जासंथारयं पडिग्गाहेत्तए '७२९'।१६। कप्पइ निग्गन्थीण वा निग्गन्थीण वा अहाराइणियाए किइकम्मं करेत्तए '८६९'।१७। नो कप्पइ निग्गन्थाण वा निग्गन्थीण वा अंतरगिहंसि चिट्ठित्तए वा आसइत्तए वा निसीइत्तए वा तुयट्ठित्तए वा निद्दाइत्तए वा पयलाइत्तए वा असणं वा० आहारमाहारेत्तए उच्चारं वा० परिट्ठवेत्तए सज्झायं वा करेत्तए झाणं वा झाइत्तए काउस्सग्गं वा करेत्तए ठाणं वा ठाइत्तए, अह पुण एवं जाणेज्जा जराजुण्णे वाहिए थेरे तवस्सी दुब्बले किलन्ते जजरिए मुच्छेज्ज वा पवडेज्ज वा एवं से कप्पइ अंतरगिहंसि चिट्ठित्तए वा जाव ठाणं वा ठाइत्तए '८८१'।१८। नो कप्पइ निग्गन्थाण वा निग्गन्थीण वा अंतरगिहंसि जाव चउगाहं वा पंचगाहं वा आइक्खित्तए वा विभावित्तए वा किट्ठित्तए वा पवेइत्तए वा नन्नत्थ एगनाएण वा एगवागरणेण वा एगगाहाए वा एगसिलोएण वा, सेवि य ठिच्चा, नो चेव

णं अट्टिच्चा '९०५'।१९। नो कप्पइ निग्गंथाण वा निग्गंथीण वा अंतरगिहंसि इमाइं पंच महव्वयाइं सभावणाइं आइक्खित्तए वा जाव पवेइत्तए वा नन्नत्थ एगनाएण वा जाव एगसिलोएण वा, सेवि य ठिच्चा, नो चेव णं अट्टिच्चा '९१३'।२०। नो कप्पइ निग्गंथाण वा निग्गंथीण वा पाडिहारियं सेज्जासंधारणं आयाए अपडिहट्टु संपव्वइत्तए '९२५'।२१। नो कप्पइ निग्गंथाण वा निग्गंथीण वा सागारियसंतियं सेज्जासंधारणं आयाए अहिगरणं (२४१) कट्टु संपव्वइत्तए, कप्पइ निग्गंथाण वा निग्गंथीण वा पाडिहारियं वा सागारियसंतियं वा सेज्जासंधारणं आयाए विगरणं कट्टु संपव्वइत्तए '९३०'।२२। इह खलु निग्गंथाण वा निग्गंथीण वा पाडिहारिए वा सागारियसंतिए वा सेज्जासंधारणं विप्पणसेज्जा (परिभट्टे सिया) से य अणुगवेसियव्वे सिया, से य अणुगवेसमाणे लभेज्जा तस्सेव पडि (अणुप) दायव्वे सिया, से य अणुगवेसमाणे नो लभेज्जा एवं से कप्पइ दोच्चंपि उग्गहं अणुणवेत्ता परिहारं परिहरित्तए '९६४'।२३। जद्विवसं च णं समणा निग्गंथा सेज्जासंधारणं विप्पजहति तद्विवसं च णं अवरे समणा निग्गंथा हव्वमागच्छेज्जा स च्चेव ओग्गहस्स पुव्वाणुन्नवणा चिट्ठइ अहालन्दमवि उग्गहं ।२४। अत्थि या इत्थ केइ उवस्सयपरियावन्नए अचित्ते परिहरणारिहे स च्चेव उग्गहस्स पुव्वाणुन्नवणा चिट्ठइ अहालन्दमवि उग्गहं '१७८'।२५। से वत्थुसु अव्वावडेसु अव्वोगडेसु अपरपरिग्गहीएसु सच्चेव उग्गहस्स पुव्वाणुन्नवणा चिट्ठइ अहालन्दमवि उग्गहं ।२६। से वत्थुसु वावडेसु वोगडेसु परपरिग्गहीएसु भिक्खुभावस्स अट्टाए दोच्चंपि उग्गहे अणुन्नवेयव्वे सिया अहालन्दमवि उग्गहं '११०४'।२७। से अणुकुड्डेसु वा अणुभित्तीसु वा अणुचरियासु वा अणुफरिहासु वा अणुपंथेसु वा अणुमेरासु वा सच्चेव उग्गहस्स पुव्वाणुन्नवणा चिट्ठइ अहालन्दमवि उग्गहं '१११०'।२८। से गामंसि वा जाव रायंहाणीए (संनिवेसंसि) वा बहिया सेणं संनिविट्ठं पेहाए कप्पइ निग्गंथाण वा निग्गंथीण वा तद्विवसं भिक्खायरियाए गंतूणं पडिनियत्तए, नो से कप्पइ तं रयणिं तत्थेव उवाइणावेत्तए, जो खलु निग्गंथे वा निग्गंथी वा तं रयणि तत्थेव उवाइणावेइ उवाइणावेतं वा साइज्जइ से दुहओ वीइक्कममाणे आवज्जइ चाउम्मासियं परिहारट्टाणं अणुग्घाइयं '११५५'।२९। से गामंसि वा जाव संनिवेसंसि वा कप्पइ निग्गंथाण वा निग्गंथीण वा सव्वओ समंता सक्कोसं जोयणं उग्गहं ओगिण्हित्ताणं चिट्ठित्तएत्तिबेसि '११९२' ★★ ★ ।३०॥ तइओ उदेसो ३॥ ★★ ★ तओ अणुग्घाइया पन्नता तंजहा-हत्थकम्मं करेमाणे मेहुणं पडिसेवमाणे राइभोयणं भुअमाणे '९२'।१। तओ पारंचिया पन्नता तंजहा-दुट्टे पारंचिए पमत्ते पारंचिए अन्नमन्नं करेमाणे पारंचिए '१८१'।२। तओ अणुवट्टप्पा पं० तं०-साहम्मियाणं तेन्नं करेमाणे परधम्मियाणं तेन्नं करेमाणे हत्थायालं दलमाणे '२६२'।३। तओ नो कप्पन्ति वाएत्तए तं०-पण्डए कीवे वाइए '३१४'।४। एवं मुण्डावेत्तए सिक्खावेत्तए सेहावित्तए उवट्टावेत्तए संभुअित्तए संवासित्तए '३२१'।५। तओ नो कप्पन्ति वाएत्तए तं०-अविणीए विगईपडिबद्धे अविओसवियपाहुडे, तओ कप्पन्ति वाएत्तए तं०-विणीए नो विगईपडिबद्धे विओसवियपाहुडे '३३५'।६। तओ दुस्सन्नप्पा पं० तं०-दुट्टे मूढे वुग्गाहिए '३५८'।७। तओ सुस्सन्नप्पा पं० तं०-अदुट्टे अमूढे अवुग्गाहिए '३६०'।८। निग्गंथं च णं गिलायमाणं माया वा भगिणी वा धूया वा पलिस्सएज्जा तं च ग्गिन्थे साइज्जेज्जा मेहुणुपडिसेवणपत्ते आवज्जइ चाउम्मासियं परिहारट्टाणं अणुग्घाइयं ।९। निग्गंथिं च णं गिलायमाणं पिया वा भाया वा पुत्ते वा पलिस्सएज्जा तं च निग्गन्थी साइज्जेज्जा मेहुणपडिसेवणपत्ता आवज्जइ चाउम्मासियं परिहारट्टाणं अणुग्घाइयं '३८७'।१०। नो कप्पइ निग्गन्थाण वा निग्गन्थीण वा असणं वा० पढमाए पोरिसीए पडिग्गाहेत्ता चउत्थं पच्छिमं पोरिसिं उवाइणावेत्तए, से य आंच्च उवाइणाविए सिया तं नो अप्पणा भुअज्जा नो अन्नेसिं अणुप्पदेज्जा एगन्तमन्ते बहुफासुए पएसे (थंडिले) पडिलेहिता पमज्जित्ता परिट्टवेयव्वे सिया, तं अप्पणा भुअमाणे अन्नेसिं वा दल (अणुप्पदे) माणे आवज्जइ चाउम्मासियं परिहारट्टाणं उग्घाइयं ।११। नो कप्पइ निग्गन्थाण वा निग्गन्थीण वा असणं वा० परं अब्बजेयणमेराए उवाइणावेत्तए, से य आहच्च उवाइणाविए सिया तं नो अप्पणा भुअेज्जा नो अन्नेसिं अणुप्पदेज्जा एगन्तमन्ते बहुफासुए पएसे पडिलेहिता पमज्जित्ता परिट्टवेयव्वे सिया, तं अप्पणा भुअमाणे अन्नेसिं वा दलमाणे आवज्जइ चाउम्मासियं परिहारट्टाणं उग्घाइयं '४३९'।१२। निग्गन्थेण य गाहावइकुलं पिण्डबायपडियाए अणुप्पविट्ठेणं अन्नयरे अचित्ते अणेसणिज्जे पाणभोयणे पडिग्गहिए सिया अत्थि य

कप्पइ अन्नं गणं संभोगपडियाए उवसंपज्जित्ताणं विहरित्तए, ते य से नो वियरंति एवं से नो कप्पइ अन्नं गणं संभोगपडियाए, उवसंपज्जित्ताणं विहरित्तए, जत्थुत्तरियं धम्मविणयं लभेज्जा एवं से कप्पइ अन्नं गणं संभोगपडियाए उवसंपज्जित्ताणं विहरित्तए, जत्थुत्तरियं धम्मविणयं नो लभेज्जा एवं से नो कप्पइ अन्नं गणं संभोगपडियाए उवसंपज्जित्ताणं विहरित्तए ।२०। भिक्खू य इच्छेज्जा अन्नं आयरियउवज्झायं उद्दिसावेत्तए नो से कप्पइ अणापुच्छित्ता आयरियं वा जाव गणावच्छेइयं वा अन्नं आयरियउवज्झायं उद्दिसावेत्तए, कप्पइ से आपुच्छित्ता आयरियं वा जाव गणावच्छेइयं वा अन्नं आयरियउवज्झायं उद्दिसावेत्तए, ते य से वियरंति एवं से कप्पइ अन्नं आयरियउवज्झायं उद्दिसावेत्तए, कप्पइ से तेसिं कारणं दीवेत्ता०।२१। गणावच्छेइए य इच्छेज्जा अन्नं आयरियउवज्झायं उद्दिसावेत्तए, नो से कप्पइ गणावच्छेइयस्स गणावच्छेइयत्तं अनिक्खिवित्ता अन्नं आयरियउवज्झायं उद्दिसावेत्तए, कप्पइ से गणावच्छेसयस्स गणावच्छेइयत्तं निक्खिवित्ता० उद्दिसावेत्तए, नो से कप्पइ अणापुच्छित्ता आयरियं वा जाव गणावच्छेइयं वा अन्नं आयरियउवज्झायं उद्दिसावेत्तए, कप्पइ से आपुच्छित्ता आयरियं वा जाव गणावच्छेइयं वा अन्नं आयरियउवज्झायं उद्दिसावेत्तए, ते य से वियरंति एवं से कप्पइ अन्नं आयरियउवज्झायं उद्दिसावेत्तए, ते य से नो वियरंति एवं से नो कप्पइ अन्नं आयरियउवज्झायं उद्दिसावेत्तए, नो से कप्पइ तेसिं कारणं अदीवेत्ता अन्नं आयरियउवज्झायं उद्दिसावेत्तए, कप्पइ से तेसिं कारणं दीवेत्ता अन्नं आयरियं वा उवज्झायं वा उद्दिसावेत्तए '६१७'।२२। आयरियउवज्झाए इच्छेज्जा अन्नं आयरियउवज्झायं उद्दिसावेत्तए, नो से कप्पइ आयरियउवज्झायस्स आयरियउवज्झायत्तं अनिक्खिवित्ता अन्नं आयरियउवज्झायं उद्दिसा वित्तए, कप्पइ से० निक्खिवित्ता० उद्दिसावित्तए, नो से कप्पइ अणापुच्छित्ता आयरियं वा जाव गणावच्छेइयं वा अन्नं आयरियउवज्झायं उद्दिसावेत्तए, कप्पइ से आपुच्छित्ता आयरियं वा जाव गणावच्छेइयं वा अन्नं आयरियउवज्झायं उद्दिसावेत्तए, नो से कप्पइ तेसिं कारणं अदीवेत्ता अन्नं आयरियउवज्झायं उद्दिसावेत्तए, कप्पइ से तेसिं कारणं दीवेत्ता अन्नं आयरियउवज्झायं उद्दिसावेत्तए '६२१'।२३। भिक्खू य राओ वा वियाले वा आहच्च वीसुम्भेज्जा, तं च सरीरगं केई वेयावच्चकरा भिक्खू इच्छेज्जा एगंतमते बहुफासुए पएसे परिट्टवेत्तए, अत्थि य इत्थ केइ सागारियसंतिए उवगरणजाए अचित्ते परिहरणारिहे कप्पइ से सागारकडं गहाय तं सरीरगं एगंते बहुफासुए पएसे परिट्टवेत्ता तत्थेव उवनिक्खेवियव्वे सिया '६९०'।२४। भिक्खू य अहिगरणं कट्टु तं अहिगरणं अविओसवेत्ता नो से कप्पइ गाहावइकुलं भत्ताए वा पाणाए वा निक्खमित्तए वा पविसित्तए वा, भिक्खू० नो से कप्पइ बहिया वियारभूमिं वा विहारभूमिं वा निक्ख० पवि० वा, भिक्खू० गामाणुगामं दुइज्जित्तए० गणाओ गणं संकमित्तए,० वासावासं वा वत्थए, जत्थेव अप्पणो आयरियउवज्झायं पासेज्जा बहुस्सुयं बज्झागामं कप्पइ से तस्सन्तिए आलोएत्तए पडिक्कमित्तए निन्दित्तए गरहित्तए विउट्टित्तए विसोहित्तए अकरणाए अब्भुट्टित्तए अहारिहं पायच्छित्तं तवोकम्मं पडिवज्जित्तए, से य सुएण पट्टविए आइयव्वे सिया, से य सुएणं नो पट्टविए नो आइयव्वे सिया, से य सुएणं पट्टविज्जमाणे नो आइयइ निज्जूहियव्वे सिया '७१८'।२५। परिहारकप्पट्टियस्स णं भिक्खुस्स कप्पइ आयरियउवज्झायाणं तद्विवसं एगगिहंसि पिंडवायं दवावेत्तए, तेण परं नो से कप्पइ असणं वा० दाउं वा अणुप्पदाउं वा, कप्पइ से अन्नयरं वेयावडियं करेत्तए, तं०-उट्टावणं वा निसीयावणं वा तुयट्टावणं वा उच्चारपासवणखेलजल्लसिइघाणाण विगिंचणं वा विसोहणं वा करेत्तए, अह पुण एवं जाणेज्जा छिन्नावाएसु पंथेसु तवस्सी आउरे झिज्झिए पिवसिए दुब्बले किलंते मुच्छेज्ज वा पवडेज्ज वा एवं से कप्पइ असणं वा० दाउं वा अणुप्पदाउं वा '७४१'।२६। नो कप्पइ निगंथाण वा निगंथीण वा इमाओ पंच महण्णवाओ महानईओ उद्दिट्ठाओ गणियाओ वज्जियाओ अंतो मासस्स दुक्खुत्तो वा तिक्खुत्तो वा उत्तरित्तए वा संतरित्तए वा, तं०-गंगा जउणा सरयू कोसिया मही ।२७। अह पुण एवं जाणेज्जाएरावई कुणालाए, जत्थ चक्किया एगं पायं जले किच्चा एगं पायं थले किच्चा एवं णं कप्पइ अंतो मासस्स दुक्खुत्तो वा तिक्खुत्तो वा उत्तरित्तए वा संतरित्तए वा, जत्थ एवं नो चक्किया एवं णं नो कप्पइ अंतो मासस्स दुक्खुत्तो वा तिक्खुत्तो वा उत्तरित्तए वा संतरित्तए वा '७८८'।२८। से तणेसु वा तणपुअेसु वा पलालेसु वा पलालपुअेसु वा अप्पंडेसु अप्पपाणेसु अप्पबीएसु अप्पहरिएसु अप्पोसेसु अप्पुतिङ्गपणगदगमट्टियंमक्कडसंताणएसु अहेसेवणमायाए नो कप्पइ निगन्थाण वा निगन्थीण वा तहप्पगारे उवस्सए हेमन्तगिम्हासु वत्थए ।२९। से तणेसु वा

जाव संताणएसु वा उप्पिंसेवणमायाए कप्पइ निग्गन्थाण वा निग्गन्थीण वा तहप्पगारे उवस्सए हेमन्तगिम्हासु वत्थए ।३०। से तणेसु वा जाव संताणएसु अहेरयणिमुक्कामउडेसु नो कप्पइ निग्गन्थाण वानिग्गन्थीण वा तहप्पगारे उवस्सए वासावासं वत्थए ।३१। से तणेसु वा जाव संताणएसु उप्पिंरयमणिमुक्कमउडेसु कप्पइ निग्गन्थाण वा निग्गन्थीण वा तहप्पगारे उवस्सए वत्थएत्ति बेमि '८०५'।३२॥ चउत्थो उद्देसओ ४॥ देवे य इत्थिरूवं विउव्वित्ता निग्गन्थं पडिग्गाहेज्जा तं च निग्गन्थे साइज्जेज्जा मेहुणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ।१। देवे य पुरिसरूवं विउव्वित्ता निग्गन्थिं पडिग्गाहेज्जा तं च निग्गन्थे साइज्जेज्जा मेहुणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ।२। देवी य इत्थिरूवं विउव्वित्ता निग्गन्थं पडिग्गाहेज्जा तं च निग्गन्थे साइज्जेज्जा मेहुणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ।३। देवी य पुरिसरूवं विउव्वित्ता निग्गन्थिं पडिग्गाहेज्जा तं च निग्गन्थी साइज्जेज्जा मेहुणपडिसेवणपत्ता आवज्जइ चाउम्मासियं परिहारट्ठाणं अणुग्घाइयं '४४'।४। भिक्खू य अहिगरणं कट्टु तं अहिगरणं अविओसवेत्ता इच्छेज्जा अन्नं गणं उवसंपज्जित्ताणं विहरित्तए, कप्पइ तस्स पञ्च राइंदियाइं छेयं कट्टु परिणिव्वविय २ दोच्चंपि तमेव गणं पडिनिज्जाएयव्वे सिया, जहा वा तस्स गणस्स पत्तियं सिया '१००'।५। भिक्खू य उग्गयवित्तीए अणत्थमियसंकप्पे संथडिए निव्विइगिच्छासमावण्णेणं अप्पाणेणं असणं वा० पडिग्गाहेत्ता आहारमाहारेमाणे अह पच्छा जाणेज्जा-अणुग्गए सूरिए अत्थमिए वा सेजं च आसयंसि जं च पाणिंसि जं च पडिग्गहे तं विगिञ्चमाणे वा विसोहेमाणे वा नो अइक्कमइ, तं अप्पणा भुञ्जेमाणे अन्नेसिं वा दलमाणे राइभोयणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ।६। भिक्खू य उग्गयवित्तीए अणत्थमियसंकप्पे संथडिए विइगिच्छासमावन्नेणं अप्पाणेणं असणं वा० पडिग्गाहेत्ता आहारमाहारेमाणे अह पच्छा जाणेज्जा-अणुग्गए सूरिए अत्थमिए वा, से जं च आसयंसि जं च पाणिंसि जं च पडिग्गहे तं विगिञ्चमाणे वा विमोहेमाणे वा नो अइक्कमइ, तं अप्पणा भुञ्जेमाणे अन्नेसिं वा दलमाणे राइभोयणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं ।७। भिक्खू य उग्गयवित्तीए अणत्थमियसंकप्पे असंथडिए निव्विइगिच्छसमावण्णेणं अप्पाणेणं असणं वा० पडिग्गाहेत्ता आहारमाहारेमाणे अह पच्छा० जाणेज्जा-अणुग्गए सूरिए अत्थमिए वा, से जं च आसयंसि जं च पाणिंसि जं च पडिग्गहे तं विगिञ्चमाणे वा विसोहेमाणे वा नाइक्कमइ, तं अप्पणा भुञ्जेमाणे अन्नेसिं वा दलमाणे राइभो० चाउम्मासियं परिहारट्ठाणं अणुग्घाइयं ।८। भिक्खू य उग्गयवित्तीए अणत्थमियसंकप्पे असंथडिए विइगिच्छासमावन्नेणं अप्पाणेणं असणं वा० पडिग्गाहेत्ता आहारमाहारेमाणे अह पच्छा जाणेज्जा-अणुग्गए सूरिए अत्थमिए वा, से जं च मुहे जं च पाणिंसि जं च पडिग्गहंसिं तं विगिञ्चमाणे वा विसोहेमाणे वा न अइक्कमइ, तं अप्पणा भुञ्जेमाणे अन्नेसिं वा दलमाणे राइभोयणपडिसेवणपत्ते आवज्जइ चाउम्मासियं परिहारट्ठाणं अणुग्घाइयं '१४५'।९। इह खलु निग्गन्थस्स वा निग्गन्थीए वा राओ वा वियाले वा सपाणे सभोयणे उग्गाले आगच्छेज्जा तं विगिञ्चमाणे वा विसोहेमाणे वा नो अइक्कमइ, तं उग्गिलित्ता पच्चोगिलमाणे राइभोयणपडिसेवणपत्ते आवज्जइ चाउम्मासियं परिहारट्ठाणं '१७७'।१०। निग्गन्थस्स य गाहावइकुलं पिण्डवायपडियाए अणुप्पविट्ठस्स अंतो पडिग्गहंसिं से पाणे वा बीए वा एए वा परियावज्जेज्जा तं च संचाएइ-विगिञ्चित्तए वा विसोहित्तए वा तओ पुव्वामेव आलोइय २ विसोहिय २ तओ संजयामेव भुञ्जेज्जा वा पिएज्ज वा, तं च नो संचाएइ विगिञ्चित्तए वा विसोहेत्तए वा तं नो अप्पणा भुञ्जेज्जा नो अन्नेसिं दावए एगन्ते बहुफासुए पएसे थंडिले पडिलेहित्ता पमज्जित्ता परिट्ठवेयव्वे सिया '२३३'।११। निग्गन्थस्स य गाहावइकुलं पिण्डवायपडियाए अणुप्पविट्ठस्स अंतो पडिग्गहंसिं दए वा दगरए वा दगफुसिए वा परियावज्जेज्जा से य उसिणे भोयणजाए परिभोत्तव्वे सिया, से य नो उसिणे सीए भोयणजाए तं नो अप्पणा भुञ्जेज्जा नो अन्नेसिं दावए एगन्ते बहुफासुए पएसे थंडिले पडिलोहित्ता पमज्जित्ता परिट्ठवेयव्वे सिया '२३५'।१२। निग्गन्थीए य राओ वा वियाले वा उच्चारं वा पासवणं वा विगिञ्चमाणीए वा विसोहेमाणीए वा अन्नयरे पसुजाइच वा पक्खिजाइए वा अन्नयरं इन्दियजायं परामुसेज्जा तं च निग्गन्थी साइज्जेज्जा हत्थकम्मपडिसेवणपत्ता आवज्जइ चाउम्मासियं परिहारट्ठाणं अणुग्घाइयं ।१३। निग्गन्थीए य राओ वा वियाले वा उच्चारं वा

पासवणं वा विगिञ्चमाणीए वा विसोहेमाणीए वा अन्नयरे पसुजाइए वा पक्खिजाइए वा अन्नयरंसि सोयंसि ओगाहेज्जा तं च निग्गन्थी साइज्जेज्जा मेहुणपडिसेवणपत्ता आवज्जइ चाउम्मासियं परिहारट्ठाणं अणुग्घाइयं '२४५'।१४। नो कप्पइ निग्गन्थीए एगाणियाए होत्तए ।१५। नो कप्पइ निग्गन्थीए एगाणियाए गाहावइकुलं भत्ताए वा पाणाए वा निक्खमित्तए वा पविसित्तए वा ।१६। नो कप्पइ निग्गन्थीए एगाणियाए बहिया वियारभूमिं वा विंहारभूमिं वा निक्खमित्तए वा पविसित्तए वा ।१७। नो कप्पइ निग्गन्थीए एगाणियाए गामाणुगामं दूइज्जित्तए ।१८। नो कप्पइ निग्गन्थीए एगाणियाए वासावासं वत्थए '२५१'।१९। नो कप्पइ निग्गन्थीए अचेलियाए होत्तए '२५६'।२०। नो कप्पइ निग्गन्थीए पेइयाए होत्तए '२६०'।२१। नो कप्पइ निग्गन्तीए वोसट्ठकाइयाए होत्तए '२६१'।२२। नो कप्पइ निग्गन्थीए बहिया गामस्स वा जाव संनिवेसस्स वा उड्ढं बाहाओ पगिज्झिय २ सूराभिमुहाए एगपाइयाए च्चि आयावणाए आयावेत्तए ।२३। कप्पइ से उवस्सयस्स अंतो वगडाए संघाडिपडिबद्धाए पलंबियबाहि (हु) याए समतलपाइयाए ठिच्चा आयावणाए आयावेत्तए '२६९'।२४। नो कप्पइ निग्गन्थीए ठाणाइयाए होत्तए ।२५। नो कप्पइ निग्गन्थीए पडिमट्ठाइयाए होत्तए ।२६। नो कप्पइ निग्गन्थीए उक्कुडियासणियाए होत्तए ।२७। नो कप्पइ निग्गन्थीए नेसिज्जियाए होत्तए ।२८। नो कप्पइ निग्गन्थीच वीरासणियाए होत्तए ।२९। नो कप्पइ निग्गन्थीए दण्डासणियाए होत्तए ।३०। नो कप्पइ निग्गन्थाण लगण्डासाइयाए होत्तए ।३१। नो कप्पइ निग्गन्थीए ओमंथियाए होत्तए ।३२। नो कप्पइ निग्गन्थीए उताणियाए होत्तए ।३३। नो कप्पइ निग्गन्थीए अम्बखुज्जियाए होत्तए ।३४। नो कप्पइ निग्गन्थीए एगपासियाए होत्तए '२८१'।३५। नो कप्पइ निग्गन्थीणं आउञ्चणपट्ठं धारेत्तए वा परिहरित्तए वा ।३६। कप्पइ निग्गन्थीणं आउञ्चणपट्ठं धारेत्तए वा परिहरित्तए वा ।३७। नो ।३०। नो कप्पइ निग्गन्थीएकप्पइ निग्गन्थीणं सावस्सयंसि आसणंसि चिट्ठित्तए वा निसीइत्तए वा आसइत्तए वा तुयट्ठित्तए वा ।३८। कप्पइ निग्गन्थीणं सावस्सयंसि आसणंसि चिट्ठित्तए वा निसीइत्तए वा आसइत्तए वा तुयट्ठित्तए या ।३९। नो कप्पइ निग्गन्थीणं सविसाणंसि फलगंसि वा पीढंसि वा जाव तुयट्ठित्तए वा ।४०। कप्पइ निग्गन्थीणं जाव तुयट्ठित्तए वा '२८९'।४१। नो कप्पइ निग्गन्थीणं सवेण्टयं लाउयं धारेत्तए वा परिहरित्तए वा ।४२। कप्पइ निग्गन्थीणं सवेण्टयं लाउयं धारेत्तए वा परिहरित्तए वा '२९०'।४३। नो कप्पइ निग्गन्थीणं सवेण्टया पायकेसरिया धारेत्तए वा परिहरित्तए वा ।४४। कप्पइ निग्गन्थाणं सवेण्टया पायकेसरिया धारेत्तए वा परिहरित्तए वा '२९१'।४५। नो कप्पइ निग्गन्थीणं दारूदण्डयं पायपुञ्छणं धारेत्तए वा परिहरित्तए वा ।४६। कप्पइ निग्गन्थाणं दारूदण्डयं पायपुञ्छणं धारेत्तए वा परिहरित्तए वा '२९२'।४७। नो कप्पइ निग्गन्थाणं वा निग्गन्थीण वा अन्नमन्नस्स मोयं आइत्तए वा आयमित्तए वा नन्नत्थ आगाढानागाढेसु रोगायङ्केसु '३१२' ।४८। नो कप्पइ निग्गन्थाण वा निग्गन्थीण वा पारियासियस्स आहारस्स जाव तयप्पमाणमेत्तमवि भूइप्पमाणमेत्तमवि बिंदुप्पमाणमेत्तमवि आहारमाहारेत्तए, नन्नत्थ आगाढानागाढेसु रोगायङ्केसु '३२८' ।४९। नो कप्पइ निग्गन्थाण वा निग्गन्थीण वा पारियासिएणं आलेवणजाएणं गायाइं (२४२) आलिम्पित्तए वा विलिंपित्तए वा, नन्नत्थ आगाढानागाढेहिं रोगायङ्केहिं '३४०' ।५०। नो कप्पइ निग्गन्थाण वा निग्गन्थीण वा पारियासिएणं तेल्लेण वा घएण वा नवणीएण वा वसाए वा गायाइं अब्भज्जित्तए वा मक्खेत्तए वा, नन्नत्थ आगाढानागाढेहिं रोगायङ्केहिं (नो कप्पइ निग्गन्थाण वा निग्गन्थीण वा कक्केण वा लोद्धेण वा पधूवणेण वा अन्नयरेण वा आलेवणजाएणं गायाइं उव्वलेत्तए वा उव्वट्ठेत्तए वा, नन्नत्था आगानागाढेहिं रोगायङ्केहिं) '३४८'।५१। परिहारकप्पट्ठिए णं भिक्खू बहिया थेराणं वेयावडियाए गच्छेज्जा, से य आहच्च अइक्कमेज्जा, तं च थेरा जाणेज्जा, अप्पणो आगमेणं अन्नेसिं वा अंतिए सोच्चा, तओ पच्छा तस्स अहालहुस्सए नाम ववहारे पट्टवियव्वे सिया '३६२'।५२। निग्गन्थीए य गाहावइकुलं पिण्डवायपडियाए अणुप्पविट्ठाए अन्नयरे पुलागभत्ते पडिग्गाहिए सिया, सा य संथरेज्जा कप्पइ से तद्विसं तेणेव भत्तट्ठेणं पज्जोसवेत्तए, नो से कप्पइ दोच्चंपि गाहावइकुलं पिण्डवायपडियाए० पविसित्तए, सा य नो संथरेज्जा एवं से कप्पइ दोच्चंपि गाहावइकुलं पिण्डवायपडियाए भत्ताए वा पाणाए वा निक्खमित्तए वा पविसित्तए वत्ति बेमि '३७५'।☆☆☆ ५३। पञ्चमो उद्देसओ ५॥ ☆☆☆ नो कप्पइ निग्गन्थाण वा निग्गन्थीण वा इमाइं छ अवयणाइं

वइत्तए, नं०-अलियवयणे हीलियवयणे खिंसियवयणे फरूसवयणे गारत्थियवयणे विओसवियं वा पुणो उदीरेत्तए '६९'।१। छ कप्पस्स पत्थारा पं० तं०-पाणाइवायस्स वायं वयमाणे मुसावायस्स वायं वयमाणे अदिन्नादाणस्स वायं वयमाणे अविरइयवायं वयमाणे अपुरिसवायं वयमाणे दासवायं वयमाणे, इच्चेए कप्पस्स छप्पत्थारे पत्थरेत्ता सम्मं अप्पडिपूरेमाणे तट्टाणपत्ते सिया '९९'।२। निग्गंथस्स य अहे पायंसि खाणुए वा कंटए वा हीरे वा सक्करे वा पयिवज्जेज्जा हं च निग्गंथे नो संचाएज्जा नीहरित्तए वा विसोहेत्तए वा, तं निग्गंथी नीहरमाणी वा विसोहेमाणी वा नाइक्कमइ।३। निग्गंथस्स य अच्छिंसि पाणे वा बीए वा रए वा परियावज्जेज्जा, तं च निग्गंथे नो संचाएज्जा नीहरित्तए वा विसोहेत्तए वा, तं निग्गंथी नीहरमाणी वा विसोहेमाणी वा नाइक्कमइ।४। निग्गंथीए य अहे पायंसि खाणूए वा कंटक वा ही वा सक्कर वा परियावज्जेज्जा तं च निग्गंथी नो संचाएज्जा नीहरित्तए वा विसोहेत्तए वा, तं च निग्गंथे नीहरमाणे वा विसोहेमाणे वा नाइक्कमइ।५। निग्गंथीए व अच्छिंसि पाणे वा बीए वा रए वा परियावज्जेज्जा, तं च निग्गंथी नो संचाएइ नीहरित्तए वा विसोहेत्तए वा, तं च निग्गंथे नीहरमाणे वा विसोहेमाणे वा नाइक्कमइ '११८'।६। निग्गंथे निग्गंथिं दुग्गंसि वा विसमंसि वा पव्वयंसि वा पक्खलमाणिं वा ओवुज्झमाणिं वा गेण्हमाणे वा अवलम्बमाणे वा नाइक्कमइ।७। निग्गंथे निग्गंथिं सेयंसि वा पंकंसि वा पणगंसि वा उदयंसि वा ओकसमाणिं वा ओवुज्झमाणिं वा गेण्हमाणे वा अवलम्बमाणे वा नाइक्कमइ।८। निग्गंथे निग्गंथिं नावं आरूभमाणिं वा ओरूभमाणिं वा गेण्हमाणे वा अवलम्बमाणे वा नाइक्कमइ '१३१'।९। खित्तचित्तं निग्गंथि निग्गंथे गिण्हमाणे वा अवलंबमाणे वा नातिक्रमति '१७८'।१०। दित्तचित्तं निग्गंथिं निग्गंथे गेण्हमाणे वा अवलम्बमाणे वा नाइक्कमइ '१९३'।११। जक्खाइट्ठं०।१२। उम्मायपत्तं०।१३। उवसग्गपत्तं०।१४। साहिगरणं०।१५। सपायच्छित्तं०।१६। भत्तपाणपडियाइक्खियं०।१७। अट्टजायं निग्गंथिं निग्गंथे गेण्हमाणे वा अवलम्बमाणे वा नाइक्कमइ '२४८'।१८। छ कप्पस्स पलिमंथू पं० तं० कोक्कुइए संजमस्स पलिमंथू मोहरिए सच्चवयणस्स पलिमंथू तित्तिणिए एसणागोयरस्स पलिमंथू चक्खुलोलुए ईरियावहियाए पलिमंथू इच्छालोभे मुत्तिमग्गस्स पलिमंथू भिज्जानियाणकरणे मोक्खमग्गस्स पलिमंथू, सव्वत्थ भगवया अनियाणया पसत्था '२८६'।१९। छव्विहा कप्पट्ठिई पं० तं०-सामाइयसंजयकप्पट्ठिई छेओवट्टावणियसंजयकप्पट्ठिई निव्विसमाणकप्पट्ठिई निव्विट्टकाइयकप्पट्ठिई जिणकप्पट्ठिई थेरकप्पट्ठिइत्तिबेमि '४२८'।२०। छट्ठो उद्देसओ ६॥

श्रीबृहत्कल्पच्छेदसूत्रं ५५५